

# DOMENIE XXIX «VIE PAL AN»

## Jutoris pe Liturgjie

Domenie, ai 22 di Otubar dal 2017

*In zornade di vuê, ancje par nô e pe nestre int e ven normâl la domande dai timps di Gjesù: Esal permetût o no di paiâi la tasse a Cesar? Isal di just paiâ lis tassis a Rome o no? Ai siei timps pre Checo Placerean al rispundeve che al jere il guviâr che al veve di paiânus nô par vie de situazion dal nestri Friûl, situazion che 567 predis a metevin in struc in cinc plais: emigrazion, servitûts militârs, mancjance des liniis di sviluf, situazion de agriculture, mancjance di une universitât (Mozion dal clero dal 1967).*

*De situazion di vuê, soledut de identitât furlane, de mont, de funzion de Universitât di Udin in relazion al teritori, de politiche regionâl, de denatalitât e dal bandon dai paîs... ducj o podìn rindisi cont di persone.*

*Ma la domande dal vanzeli di vuê no je su lis tassis di paiâ o no, ma su alc di plui impuartant: Vino di sedi sotmetûts ai governadôrs di chest mont cu la lôr imagine stampade sul diu bêç o il cristian aial un unic paron che al è il Signôr dal cîl e de tiere?*

*Ma intant comencin te antifone Jo ti clami, Diu gno, ma tu rispuidimi e te preiere de colete Diu onipotent e eterni,*

### Antifone di jentrade

Sal 16,6.8

**Jo** ti clami, Diu gno, ma tu rispuidimi.  
O soi sigûr che viers di me tu slungjis lis tôs orelis.  
Vuardimi, Signôr, come la lûs dal voli,  
platimi te ombre des tôs alis.

### Colete

Diu onipotent e eterni,  
danus une volontât che si plei simpri denant di te  
e di servî a la tô maiestât cu la scletece dal nestri cûr.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE

Is 45,1.4-6

**O** ai cjàpât **Ciro** pe gjestre, par sdrumâ denant di lui i forescj.

*I grancj dal mont, ancje vuê, si sintin parons dal mont, e a fasin alt e bas come se dut al dipendès di lôr. Chest al è vêr e nol è vêr, par vie che al dîs il salm: Chel che al è sentât in cîl i ven di ridi, di adalt il Signôr ju cjol vie. Po ur fevele plen di rabie...*

*Cussì al è ancje di cheste leture: **Ciro**, re di Persie al distrûç la grande Babilonie. Deventât paron spotic, dal 538 (o sin prime di Crist) al comence une gnove politiche li che i esiliâts di Israel a podaran tornâ te lôr tiere. Il profete al viôt in dut chest la man dal Signôr che al guide la storie e par chest **Ciro** al ven clamât onzût, consacrât.*

*Al è vêr che ancje vuê i grancj a fasin il biel e il brut timp, ma al è ancje vêr che te storie, come te nestre vite, la ultime peraule i reste e i restarà al Signôr.*

### Dal libri dal profete Isaie

Cussì i dîs il Signôr al so onzût,  
a **Ciro**, che lu à cjàpât pe gjestre,

par sdrumâ denant di lui i forescj  
e par dispeâ i cinturons dai ombui dai rês,  
par spalancâ denant di lui lis antis  
e par che lis puartis no restin sieradis.  
«Par amôr dal gno servidôr Jacop,  
e di Israel, gno elet,  
ti ai clamât par non,  
ti ai dât un titul cuant che tu no tu mi cognossevis.  
Jo o soi il Signôr, no 'nd è altris;  
denant di me nol è nissun diu!  
Ti ai peât cuant che tu no tu mi cognossevis,  
par ch'a sepin dal jevâ al lâ a mont dal soreli  
che denant di me al è il nuie;  
jo o soi il Signôr e no 'nd è altris».  
Peraule di Diu.

### SALM RESPONSORIÂL

dal Salm 95

*A la leture che o vin scoltât al devi fâ seguit un berli di gjonde parcè che la liberazion de sclavitût e la dignitât de persone a son ce che di plui profont si insede te anime umane. E in plui: dome i trois dal Signôr, pal popul di Israel, a podevin puartâ a chest.*

*Sclavitût - liberazion - dignitât: nus disino alc te nestre societât?*

*Ce podino ricuardâ par che lis peraulis e i sentiments dal salmist a pedin jessi ancje tal nestri cûr e preiere?*

### **R. A ti, Signôr, la potence e la glorie.**

*Se cjantât: Il cjant dai salms responsoriâi, p. 79.*

Cjantait al Signôr une cjante gnove,  
cjantait al Signôr di dute la tiere.  
A ducj i forescj contait de sô glorie,  
framieç di ducj i popui i siei spetacui. **R.**

Parcè che al è grant il Signôr e al merte laudât,  
tremant sore ducj i dius.  
Di fat i dius dai popui a son un nuie,  
impen che il Signôr al à fat i cîi. **R.**

Dait al Signôr, fameis dai popui,  
dait al Signôr glorie e potence,  
dait al Signôr la glorie che al so non i spiete;  
cjapait sù ufiertis e jentrait tai siei andits. **R.**

Ch'e trimi denant di lui dute la tiere.  
Disêt framieç dai popui:  
«Il Signôr al regne!».  
Al ten sù il mont par no ch'al clopi,  
al judiche i popui cun justizie. **R.**

### SECONDE LETURE

O vin presint la vuestre fede, l'amôr e la sperance.

1 Ts 1,1-5

*Sul esempi di S. Pauli, cui vino di ricuardâ noaltris, tes nestrîs preieris, pe operositât de fede, pal sfadiâ dal amôr, pe fermece de sperance tal Signôr nestrî Gjesù Crist ?*

*E tes nestrîs comunitât cemût sintîno di jessi fradis benvolûts di Diu, di vê une clamade speciâl, e che il vanzeli no nus è stât predicjât dome a peraulis ma anje cun fuarce, cun efusion dal Spirtu Sant e cun plene convinzion ?*

### **De prime letare di san Pauli apuestul ai Tessalonicês**

Pauli, Silvan e Timoteo a la glesie de int di Tessaloniche, in Diu Pari e tal Signôr Gjesù Crist: grazie a vualtris e pâs!

O ringraziin simpri Diu par ducj vualtris, ricuardantjus tes nestrîs preieris, vint presint di un continuo denant di Diu e nestrî Pari la operositât de vuestre fede, il sfadiâ dal vuestri amôr, la fermece de vuestre sperance tal Signôr nestrî Gjesù Crist. O cognossin, fradis benvolûts di Diu, la vuestre clamade, parcè che il nestrî vanzeli no us è stât predicjât dome a peraulis ma anje cun fuarce, cun efusion dal Spirtu Sant e cun plene convinzion.

Peraule di Diu.

### **CJANT AL VANZELI Fîl 2,15-16**

#### **R. Aleluia, aleluia.**

Lusît tal mont come stelis,  
tignint alte la perauale di vite.

R. Aleluia.

### **VANZELI Mt 22,15-21**

**Dait a Cesar ce ch'al è di Cesar e a Diu ce ch'al è di Diu.**

*Sui euros a son metûts i simbui de Italie o de Europe di vuê e duncje lis tassis a son di paiâ: tocje tornâ a la Regjon F-VG, a la Italie e a l'Europe ce che al è lôr, pai servizis sociâi che nus vegnin dâts. Però il cristian al à let te Bibie che e esist une imagine ben superiôr a chê de Europe e imprimude di Diu stes: Diu al creà l'om sul so stamp, lu creà sul stamp di Diu (Gjen 1, 27). La glorie di Diu no je chê dai euros o dai dolars, ma chê che che si cjate tal profont di ogni persone. Pain duncje lis tassis, doprî i bêçs, ma ni i grancj dal mont ni i euros a son i nestrîs parons. Il nestrî cûr al à di sedi tal ben dal om / femine fâts sul stamp, a imagine di Diu. Cuant che un stât al tradîs chest principi, pal cristian e devevente legitime la disubidience civîl, la obiezion di cussience.*

*Chest nus ven fat capî vuê cu lis peraulis di Gjesù: Dait duncje a Cesar ce ch'al è di Cesar e a Diu ce ch'al è di Diu.*

### **Dal vanzeli seont Matieu**

In chê volte, i fariseos, sintût che Gjesù al veve fat tasê i saduceos, ri lu creà sul stamp di Diutirâts in bande, a faserin consei par cjapâlu in fal tai siei discors. A mandarin duncje di lui i lôr dissepui, insieme cui erodians, par dîi: «Mestri, o savin che tu sês sancîr e che tu insegnis la strade di Diu cun veretât e che no tu âs sudizion di nissun; di fat no tu cjalis in muse nissun. Dîsinus alore ce che tu pensis: Esal permetût o no di paiâi la tasse a Cesar?». Gjesù, cognossint la lôr falsetât, ur disè: «Parcè volêso tentâmi, fals? Mostraitmi la monede de tasse». E i presentarin un denâr. Ur disè: «Di cui ese la muse cu la iscrizion?». I rispuindin: «Di Cesar». E lui a lôr: «Dait duncje a Cesar ce ch'al è di Cesar e a Diu ce ch'al è di Diu».

Peraule dal Signôr.

### **Su lis ufiertis**

Danus, Signôr, ti prein,  
di cirî cun cûr libar i tiei regâi,  
par che, purificâts de tô grazie,

o vignin smondeâts propit cui misteris che ti servin.  
Par Crist nestri Signôr.

### Antifone a la comunion

Sal 32,18-19

Il voli dal Signôr si poe sun chei che lu rispietin,  
sun chei che tal so boncûr a sperin,  
par sfrancjâ de muart lis lôr vitis,  
par tignîju in vite in timp di miserie.

### O ben: Mc 10,45

Il Fi dal om al è vignût par dâ la sô vite  
in riscat par tancj di lôr.

### Daspò de comunion

Il contat cu lis robis dal cîl  
che nus zovi, Signôr,  
par vê i tiei benefizis in cheste vite  
e par jessi inluminâts su lis realtâts eternis.  
Par Crist nestri Signôr.

\* \* \*

### Riflession di pre Antoni Beline: **Diu e il caisar**

Dal vanzeli di vuê si puedin rigjavâ almancul dôs robis: che o vin dibisugne di une autoritât e che, parsore di duçj e il prin di duçj al è Diu. Che l'om al vebi dibisugne di une autoritât, di une regule, di cualchidun che al direzi al diven de nature stesse dal om. Al nas tant che un poleç; anzit plui imbranât di un poleç, ch'al tache a sgripiâ a pene vierzût il scus dal ûf, a la cuâl che al om i covente almancul cualchi an...

*Vanseli par un popul, an A, p. 205*

\* \* \*

### Sante messe e Eucaristie, rîts, preieris, cjants: **Hosanna pp. 34 - 119.**

\* \* \*

*Al è di dâ al stât dut ce che – te relazion fra Diu, om e societât – a puedin ancjemò pratindi di nô, come che al dîs s. Pauli: Dait a duçj ce che a àn dirit di vê: la tasse a chel che al à dirit a la tasse, il rispiet a chel che al à dirit al rispiet, l'onôr a chel che al à dirit al onôr (Rm 13,7) ma puars mai vualtris se o fasês un pas in plui!*

*Si à di fâ il propri dovê cence confusion e ilusions, ma soledut cence comprometi Diu!*

*Si à di paiâ lis tassis, ma nissun incens pal imperadôr.*

*Si à di partecipâ a lis iniziativas come citadins e ubidî a la leç ma nissun messedament fra trono e altâr.*

Karl Barth

\* \* \*

\* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

\* *Il cjant dai salms resposoriâi, Ed. Glesie Furlane, 2012.*

\* *50 corâi de cristianitât todesceje voltâts par furlan, ed. Glesie Furlane, 2016.*

\* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*

\* *Par domandâ chescj libris scrivêt a [info@glesiefurlane.org](mailto:info@glesiefurlane.org)*